

Powšitkowne WOZJEWJENJA

njedźelu, 7. septembra 2014

W Hórkach položi so kopolak-plesternak za Hanku Šercec

Wumělc Gunter Demnig z Kölna položi pjatk, 12. septembra, w 9.30 hodź. w Hórkach před Elic statokom na Hórchanskej dróze přeni ryzy serbski kopolak-plesternak. Wón je wěnowany Hance Šercec, katolskej Serbowce židowskeho pochada, kotraž je so 1918 w Hórkach narodžiła a wotrostła. Do domu prajachu jim Křižanec. Wona bu 1942 zajata a léto na to morjena. Přenja serbska kulturna brigada swjatočnosť hudźbnje wobrubu. Hnydom po njej porěči na Elic dworje abo w bliskej rumnosći wohnjoweje wobory Gunter Demnig wo zmysle kopolakow-plesternakow kaž tež přiwuzna, kotraž je Hanku Šercec wosobinsce dožiwiła. Na zarjadowanje, na kotraž su so hižo wjacore šulske rjadownje přizjewili, su wšitcy wutrobnje přeprošeni.

Kurs k zeznaću wěry

Kružk wěry za dorosćenych, kotřiž přihotuja so na swjatu křćeńcu, započnje so srjedu, 17. septembra. Zajimcy njech so prošu přizjewja na farskej wikariji w Pančicach-Kukowje, Čišinskeho 35, telefonowe čisło (03 57 96) 9 62 65. Započatk je w 20 hodź. na farskej wikariji. *Farar Gabriš Nawka*

Nyšpor z požohnowanjom konjacych zapřahow

Towarstwo Cyrila a Metoda, sekcija wěda a skutk, přeprošuje tež lětsa na wosebity nyšpor domchowanki z požohnowanjom konjacych zapřahow. Tutón budže njedźelu, 28. septembra, w 14 hodź. w Chrósćicach na luce při Hatkach.

Zetkanje samostejacych

Samostejacy ze serbskich wosadow su na zetkanje wutoru, 16. septembra, w 14 hodź. do Domu biskopa Bena w Smochćicach přeprošeni. Zajimcy njech so hač do srjedy, 10. septembra, w redakciji Katolskeho Posoła přizjewja, telefonowe čisło (0 35 91) 55 02 12. Štóz chce wotewzaty być, njech to prošu zdžěli.

„Kurt Hajna – wobrazowy chronist“

We wobłuku wosebiteje wustajeńcy „Kurt Hajna – wobrazowy chronist“ budže srjedu, 10. septembra, wot 18 hodź. wodženje awtora ekspozicije Jürgena Maćija po wustajeńcy w Budyskim Serbskim muzeju. W 19 hodź. přizamkne so rjad krótkopřednoškow k wubranym fotowym dokumentam Kurta Hajny. Istvan Kobjela zarjadowanje hudźbnje wobrubu. Tak zaklinča twórby z 1950tych a 1960tych lět kaž tež spěwy Güntera Šwjenteka.

Koncert z Ludwigom Güttlerom

Renoměrowani docenća mišterskeho kursa blachowych dujerjow w Budyskim Serbskim ludowym ansamblu, mjez kotrymiž je tež sławny trompetar Ludwig Güttler, wuhotuja sobotu, 13. septembra, w 20 hodź. koncert w Marije Marćinej cyrkwi. Hudźbnicy zahraja mjez druhim twórby Haydna a Bacha.

Putnikowanje z kolesom

Dom biskopa Bena w Smochćicach zarjadowuje wot njedźele do njedźele, 14. do 21. septembra, putnikowanje z kolesom po Hornjej Łužicy. Wšědnje pojedu něhdže 40 do 50 kilometrow. Čary powjedu putnikow ze Smochćic do wšelakich směrow, na přikład do hole abo do lužiskich hór. Po puću budu čitanja, zamyslenja abo rozmołwy. Zajimcy njech přizjewja so w Smochćicach, telefonowe čisło (03 59 35) 2 23 15. Tam dóstanu tež nadrobniše informacije.

Swójbne popołdnjo w Njebjelčicach

Wšitcy wobdźělnicy ministrantskeho putnikowanja do Roma ze swojimi swójbnyimi kaž tež dalšimi zajimcami su přeprašeni na zhromadne popołdnjo njedźelu, 21. septembra, do Njebjelčic. Chcemy zhladować na zhromadne dny we Wěčnym měsće a sej wšelake zajimawostki lubić dać.

Swójbne popołdnjo zahaji so z nyšporom w 14.00 hodź.

w cyrkwi. Na nim zaspěwa hišće raz projektny chór ministrantow. Prošu přinjesće sej mapu ze spěwami sobu. Wšitcy putnicy njech sej swój putniski t-shirt a rubiško wobleku a tohorunja spěwnik „Twoje kralestwo njech přińdže“ sobu přinjesu.

Nyšporej přizamknje so swačina. Prosimy wo to, zo bychu starši tykancy napjekli a sobu přinjesli.

Štóž je k tomu zwólniwy, njech přizjewi to prošu pod telefonowym čisłom (03 57 96) 8 87 07.

Dekanatne dušepastyrstwo we Worklecach

Mandźelski seminar

Přichodny lětuši termin mandźelskeho seminara je pjatk a sobota, 28./29. nowembra, w Smoch-
ćicach. Přizjewić měli so zajimcy pisomnje pola Dekanatneho dušepastyrstwa, Młynski puć 4,
we 01920 Worklecach.